



Limba e iscola

de Mauru MAXIA*

Sa die 24 de gennargiu s'assessore Milia at informadu, cun tonu de suddisfazione, chi sas famìlias sardas podiant pedire pro sos figios issoro s'insinniamentu de sa limba sarda in s'annu iscolàsticu 2013-14 (mira s'articulu "Per le famiglie è possibile scegliere l'insegnamento del sardo al momento dell'iscrizione" in <http://www.regione.sardegna.it/j/v/25?s=219709&v=2&c=220&t=1>). Medas famìlias dd'ant pigadu in paraula e, nessi in sas iscolas ue sos dirigentes ant aprontadu sos mòdulos de iscrizione (medas no ant fatu mancu cussu) ant pedidu s'insinniamentu de su sardu pro sos figios chi in s'annu imbeniente ant a fàghere sa prima classe de sas iscolas maternas, primàrias e medias.



In certas iscolas (Pèrfugas, Tzaramonte, Erula, Laerru, Martis e àteras) sas famìlias chi ant pedidu s'insinniamentu de su sardu sunt resurtadas prus meda de 80%. E como? E como cussas famìlias sunt isetende chi dae su mese de cabidanni a sos figios issoro in iscola ddis insinnient finas su sardu. Ma a dolu mannu paret chi custu disigiù apat de isetare unu disigiù. Difatis, paret chi sa Regione Sardegna no apat istantziadu su dinare necessàriu pro custu tipu de insinniamentu. Solu in pagas iscolas e bia su sardu at a èssere insinniadu dae pagos mastros de ruolu chi connoschent sa limba sarda e chi, cun ispìritu de missioneris, ant a insinniare finas su sardu paris cun s'italianu e sas àteras materias curriculares. Ma in sas iscolas (e sunt casi totus) ue non ddue at mastros capaces o giai formados, s'insinniamentu de

su sardu at a isetare solu unu disigiu. A su chi paret sa Regione at istantziadu carchi cosighedda solu pro sighire in cuddos progeteddos isperimentales de custos ùrtimos annos (pagas oras de letzione in duos meses e in pagas iscolas), est a nàrrere nudda ite fàghere cun s'insinniamentu curriculare de una limba. Pro s'insinniamentu de su sardu e de sas àteras variedades de Sardigna ddue cherent istantziamentos gasi comente cale si siat àtera limba.

Tando, duas preguntas e bia: sas leges chi prevident custu tipu de insinniamentu ant a sighire a isetare lìtera morta comente in sos ùrtimos bìndighi annos? E s'annùnciu fatu in gennargiu fut solu un'annùnciu? Ca, si est gai, diat èssere istadu megius a pònner bene in craru chi sas famìlias tenent solu su deretu... de pedire.

(12-07-2013)

*Istudiosu de limbas minorizadas